

Osterøy kommune
v/Lars Fjeldstad
Postboks 1
5282 Lonevåg

Hosanger 21. april 2022

Klage på avslag på søknad om driftstilskot, 002/22, datert 4.april 2022.

Me meiner at vedtaket er gjort på feil grunnlag, og må omgjerast. Me meiner det er grunnlag for innvilging av driftstilskot til montessoribarnehage i Mjøsdaalen.

Bakgrunnen til klagen er at me meiner det er feil og manglar i grunngjevinga gjort i avslaget, og saka må difor handsamast på nytt.

I svarbrevet frå kommunen står det: «*Underteikna er barnehagemyndigheit og har vurdert søknaden*». Me finn ikkje at det er synt til heimel for at kommunen sitt vedtak er gjort administrativt, og me ber om at dette vert dokumentert.

I svarbrevet frå kommunen står det: «*Vedtaket er eit enkeltvedtak etter reglane i lov om offentlig forvaltning (fvl). Vedtaket kan lagast på til kommunen, jf. fvl §§ 28-36. Klagefristen er 3 veker frå melding om vedtak er motteke.*» Me ser ikkje at dette er i samsvar med Forskrift om tildeling av tilskudd til private barnehager der det i § 14 står: «*Statsforvalteren er klageinstans for kommunens vedtak etter § 1,*» I Merknad til de enkelte bestemmelsene i forskriften står det til § 14 at: «*Bestemmelsen innebærer at det gjøres unntak fra hovedregelen i forvaltningsloven § 28 om at kommunens eget klageorgan er klageinstans. For øvrig gjelder reglene om enkeltvedtak i forvaltningsloven.*» Slik me tolkar dette er det Statsforvaltaren som er klageinstans og ikkje kommunen, me ber om at dette vert handsama på nytt.

I svarbrevet frå kommunen står det: «*Bygget har godkjenning for barnehagedrift per i dag, men er ikkje i tråd med dei føringar som kommunen legg for god kvalitet i barnehagebygg for framtida i Barnehagebruksplanen 2021-2025. Kommunen finn at det ikkje er grunnlag for gje driftstilskot til vidare barnehagedrift i lokala til Mjøsdaalen barnehage.*»

Søknaden vår seier ikkje noko om våre planar for bygget/kva bygningsmasse som skal nyttast. Barnehagen skal drivast i samarbeid med Hosanger Montessoriskule som i dag eig både skule- og barnehagebygga. Søknad om godkjenning kjem i neste runde. Det er difor feil å bruka

tilstanden til bygningsmassen som Mjøsdaalen Barnehage nyttar som grunnlag for avslag på søknad om driftstilskot for ein ny barnehage.

I svarbrevet frå kommunen står det: *«Kommunen vurderer ut frå dette driftsforma til å vere sårbar og ikkje forsvarleg, verken med omsyn til barna sin tryggleik eller pedagogiske rammer»*. Det kjem ikkje klart fram om dette gjeld den noverande Mjøsdaalen Barnehage og/eller søknaden og tilskot til montessoribarnehage. Om det siste er tilfelle, er ikkje vurderinga grunngeve og er etter vår meining difor feilaktig.

Grunngjevinga for avslaget frå kommunen er: *«Formannskapet/Heradsstyret har vedteke Barnehagebruksplanen for 2021-2025 og har i denne vedteke at det skal drivast barnehage i dei fire lokale sentra: Haus, Valestrand, Lonevåg og Fotlandsvåg.»*

Vevle og Hauge er ikkje «lokale sentra». Likevel inneber barnehagebruksplanen at det skal drivast barnehage desse plassane. Og for t.d. Hauge barnehage er det nytta ei rad «gode» argument for å forsvare dette. Men kommunen tek ikkje for seg våre gode argument for å drive ein barnehage for heile kommunen basert på montessoripedagogikk i Mjøsdaalen. Me meiner kommunen må ta med slike moment i drøftinga før konklusjonen vert trekt.

Nye moment

Osterøy heradsstyre har vedteke å ta i mot 64 nye flyktningar. Det er svært sannsynleg at det er mange barn blant desse. Ein montessoribarnehage i Mjøsdaalen vil kunne vere eit godt tilbod for fleire av desse og vil kunne avhjelpe den auka trongen til barnehageplasser i kommunen som ikkje var kjend då barnehagebruksplanen vart vedteke.

Med venleg helsing

Initiativtakarar for stifting av montessoribarnehage i Mjøsdaalen
ved Laila Fanebust Helle